



## Lu Pâpe tchôfeû

Al rêchûe d' l' aèropôrt, cand il è oyu bin rösté lès cayèts d' sa Sint'té l' Pâpe dins l' cofe dul limouzine, lu tchôfeû wèt k' il è dméré su l' trotwâr.

- Sabâye vosse Sint'té, di-st-i l' tchôfeû, èyû ç' ku vous vlez v's assîr ? Addé mi pa dvant, û padrí su l'bankète ?

- La wê ! Ruspond l' Pâpe... A vosse place ! Ca pou tout v' dîre, ou Vatican, i n' vlèt nin m' lêcher mon.ner, adon k' dju n' tûze k' a ça, la mi ! Ç' cöp la, dj' in.mro tant ku vous m' lêchez mon.ner ènut'.

- Dju n' è pu rin, la mi, ruspond l' tchôfeû, mês si dju v' lêche mon.ner la limouzine, dju riske du piède ma place da ! Èt adon s' i gn-arive yôk ? K' èst-ç' ku dj frê mi, pôvlèt ptit ome ?

- Èt bin, di-st-i l' Sint Pére, si vous m' lêchez mon.ner, dju frê yôk du bin spécial pou vosse mènadje.

Adon, a conte keûr, lu tchofeû s' assît pa drî, et l' Pâpe, tout binôje, prind l' volant. Èt t't-ossi vite, l' ome rugrète sa dècizion ca l' Pâpe aspoye du cöp s' la pèdale dès gâz, èt vou l' la a du 170 kilomètes a l' eûre.

- Mon Diu, vosse Sint'té, dju v's-è prîe, roûlez pus doûs, dmande lu tchôfeû, ki tran.ne la culote...

Mês l' Pâpe nu l' choûte nin, èt broke come la male, dès kilomètes dèrant. Ç' cöp la, vla la sirin.ne dul police ki s' fwèt oyu, in motârd lès chût èt l'z-i fjèt sine d' arêter.

- Ké maleûr, su dit l' tchôfeû, ç' cöp ci, dju su chûre du piède ma place.

Lu Pâpe su gâre s' l' acotmint èt bache la vite cand l' djandârme s' amon.ne addé li. Mês su l' cöp k' çute ci wèt k' c' èst sa Sint'té ki mon.ne, i toûne lès talons èt va addé sa moto. I droûve sa radio èt conte a s' chèf k' i vint d' arêter ène limouzine ki roûle a du 170 km à l' heûre :

- Èdû ç' k' èst l' problème, lî ruspond s' chèf, rutirer lî s' pèrmis du cöp, sins plêder ni tchikter !

- Rastrindez, doûwô la chèf ! Dju v' dit k' c' èst kék' in d' vrémint fwârt impörtant.

- C' èst bon ! Kî ç' ku v's-avez aclapé ? Lu mayeûr ?

- Nèni, chèf, pus gros !

- In sénateûr ? In minisse ?

- Bin pus gros, chèf !

- Ç' cöp la, malèrêus, dijez-m' kî ?

- Bin dju tûze ku c' èst l' Bon Diu li min.me, da...

- Inocint ! Vous v' foutez du m' geûye ? K' èst-ç' ki v' fwèt crwâre ku c' èst l' Bon Diu li min.me ?

- Bin chèf, c' èst k' il è l' Pâpe come tchôfeû !

Adapté d'après un envoi de Pierre LEZIN (Anloy)